

Dess hälsde im Kopp nit aus

Om Somsdaachmiddaach habb ich de Schorsch oogerufe, weil der verrzeh Daach uff Reise war unn om Freidaach widder hoom kumme iss. De Schorsch saacht joo immer noch, er det in Urlaub fahrn, de-bei iss er schunn seit siwwe Johr in Rente und kriecht gar koon Urlaub mehr. Also er war in de Bersche unn ich wollt emol wisse, ob er unn soi Kättche sich aach koo Boo gebroche hawwe bei dem Erumklettern uff dene iwverhengende Wisse.

De Schorsch hott dann verzeht, dass se schee Wetter hatte, gut gesse unn gedrunke unn alles gut iwverstonne hawwe, unn nechst-johr dete se widder hiefahrn.

Unn was machts Kättche? habb ich gefroocht.

Die iss froh, dass se widder dehoom iss, doo kann se nemlich Fussball gucke, die iss joo gonz verrickt doo druff. Ich wills aach korz mache, weil jetzt bald die Deutsche geeche die Saudis spille. Dess isses ersde Spill von unserne Monnschaft unn doo will ich emol genau hiegucke. Ich habb nemlich gelese, dass unser Fussballer uns all minonner im Ausland repräsendiern due unn doo will ich emol wisse, wie die dess mache, wo die doch so vill Geld verdiene, dass mir Kloone bestimmt bei dene ihrne Repräsendatione nit debei sinn. Gucksde aach?

Ei sicher, habb ich gesaacht, was tippsden?

Mir gewinne Drei-Null unn jetzt machs gut. Moie sehn merr uns joo beim Friehschoppe.

Zwaa Stund später klingelts Telefon unn de Schorsch war droo. Er war zimmlich laut, weil während Unsere Jungs uff em Platz erum gerennt sinn, hott de Schorsch bestimmt drei Flasche Bier gedrunke.

Honnes, hotter ins Telefon gebrüllt, Honnes, hosdes gesehe? Die Fussballer hawwe aach uns repräsendiern, weil wie die die Saudis gebutzt hawwe! Acht-Null! Die Buwe hawwe aach ferr uns gekämpft unn dene e Packung gewwe, jawoll.

Unn warum moonsde, die hätte aach uns repräsendiern?

Ei weil die Saudis doch ferr dess deierne Benzin verontwortlich sinn. Acht-Null, jetzt werd de Sprit billicher!

Ruhich, Schorsch, habb ich gesaacht, du waaßt joo, dass dess Benzin aach deshalb so deier iss, weil unser Regierung so vill Steuern druffgeschlaache hott. Wie solle die Buwe uns doodebei repräsendiern?

Was de Schorsch doodruffhie ins Telefon gekrische hott, dess hälsde im Kopp nit aus: Honnes, dess mache die aach. Die dun doch om nechste Dinsdaach Schwarz schaffe.

Eiern Honnes